



Kristo ni Kiini cha Sheria

Basi, je! Twaibatilisha sheria kwa imani hiyo? Hasha! Kinyume cha hayo twaithibitisha sheria.—**Warumi 3:31.**

Miongoni mwa wote wanaodai kuwa Wakristo, Waadventista wa Sabato wanapaswa kumwinua Yesu zaidi ulimwenguni. Utangazaji wa ujumbe wa malaika wa tatu unatoa mwito wa uwasilishwaji wa ukweli wa Sabato. Ukweli huu, pamoja na nyingine zilizojumuishwa katika ujumbe, unapaswa kutangazwa; lakini kitovu kikuu cha mvuto, Kristo Yesu, hapaswi kuachwa. Ni katika msalaba wa Yesu ambapo rehema na kweli zinakutana pamoja, na haki na amani zimehusiana. Sharti mwenye dhambi aelekezwe kuutazama msalaba wa Kalvari; kwa imani sahili ya mtoto mdogo lazima aamini katika wema wa Mwokozi, akipokea haki Yake, na kuamini katika rehema Yake.

Kupitia kwa upendo wa Mungu hazina za neema ya Yesu zimewekwa mbele ya kanisa na ulimwengu. “Kwa maana jinsi hii Mungu aliupenda ulimwengu, hata akamtoa Mwanawe pekee, ili kila mtu amwaminiye asipotee, bali awe na uzima wa milele” (Yohana 3:16). Ni upendo wa ajabu kiasi gani, na usiopimika, ambao ulimwongoza Yesu kufa kwa ajili yetu tulipokuwa tungali wenye dhambi! Na ni hasara iliyoje ambayo nafsi inapata ambayo, ikielewa madai yenye nguvu ya sheria, inashindwa kukiri kwamba pale dhambi inapoongezeka, neema ya Kristo inaongezeka zaidi!

Sheria inapowasilishwa kama inavyostahili, inafunua upendo wa Mungu. Lakini haishangazi kwamba mioyo haiyeyushwi hata kwa ukweli unapooneshwa kwa njia baridi isiyo na uhai; si ajabu kwamba imani inasitasita katika ahadi za Mungu, wakati watumishi na watendakazi wanashindwa kumwakilisha Yesu katika uhusiano Wake na sheria....

Hebu mwalimu wa ukweli amjulishe mwenye dhambi ukweli halisi juu ya Mungu—Baba angojaye kwa upendo wenye shauku ya kumpokea mpotevu arudiye nyumbani, si kumtupia shutuma za hasira, bali kuandaa karamu ya kukaribisha ujio wake. Laiti sote tungeweza kujifunza njia ya Bwana katika kuongoa roho!

Mungu angevuta akili kutoka kwenye usadikisho wa mantiki hadi kwenye usadikisho wa ndani zaidi, wa juu zaidi, safi zaidi, na mtukufu zaidi. Mara nyingi mantiki ya kibinadamu imekaribia kuzima nuru ambayo Mungu angeiangaza katika miale iliyo wazi ili kuwasadikisha wanadamu kwamba Bwana wa asili anastahili sifa na utukufu wote, kwa sababu Yeye ndiye Muumba wa vitu vyote (Gospel Workers, 156-158).

Mwinue Yesu juu, wewe unayewafundisha watu, Mwinue Juu katika hubiri, katika wimbo na katika maombi. Hebu nguvu zako zote zielekezwe katika kuzielekeza roho, zilizo-changanyikiwa, tatizwa, zilizopotea kwa “Mwana-Kondoo wa Mungu.” Mwinue Juu, Mwokozi aliyefufuka, na uwaambie wote wasikiao, njoni Kwake ambaye “alitupenda sisi, na akajitoa kwa ajili yetu” (Waefeso 5:2). Hebu sayansi ya wokovu iwe mzigo wa kila hubiri, na mada ya kila wimbo. Hebu na itolewe katika kila ombi... Onesha neema na ukamilifu wa Mwokozi (Gospel Workers, 160).